

采芳隨筆卷二十二

北平查 彬伯埜輯

麥一名來又作稊小麥也有鹵水麥稅麥旋麥赤小麥山
提小麥半夏小麥禿芒麥等種大麥一名牟與小麥相
似莖微麤葉微大有穰麥赤麥青稞麥黑穰麥等種此
外又有稊麥糯麥以秋種故為首種孟夏之月為麥秋
春秋麥未不成則書此以見五穀最重麥與禾也回鶻
地又有白麥青麥麴麥木蘭國有三寸麥四月雨後謂
之麥秀寒徐凌集有麥冷之語瑞麥則有雙岐或三穗
四穗五穗九穗唐任瑗有瑞麥賦崔融有嘉麥表樂天

刈麥云田家少閒月五月人倍忙夜來南風起小麥覆
隴黃婦姑荷簞食童穉攜壺漿相隨餉田去丁壯在南
岡足蒸暑土氣背灼炎天光力盡不知熱但惜夏日長
復有貧婦人抱子在其旁右手秉遺穗左臂懸弊筐聽
其相顧言聞者為悲傷家田輸稅盡拾此充飢腸今我
何功德曾不事農桑吏祿三百石歲晏有餘糧念此私
自愧盡日不能忘鄭台文詩云聖慮憂千畝嘉苗薦兩
岐如雲方表盛成穗忽標竒瑞露縱橫滴祥風左右吹
謳謠連上苑化日遍平坡史冊書堪重丹青畫更宜願
依連理樹俱作萬年枝張聿詩云瑞麥生堯日芄芃兩

露偏兩岐分更合異畝頴仍連冀獲明王慶寧惟太守
賢仁風吹靡靡甘雨長芊芊聖德應多稔皇家配有年
已聞天下泰誰為濟西田宋王半山陂麥云陂麥連雲
慘淡黃綠陰門巷不多涼更無一片桃花在借問春歸
有底忙東坡鵝種麥行云霜林老鵝閒無用畦東拾麥
畦西種畦西種得青猗猗畦東已作牛尾稀明年麥熟
芒攢槩農夫未食鵝先啄徐行俯仰若自矜鼓翅跳踉
上牛角憶昔舜耕厯山鳥為耘如今老鵝種麥更辛勤
農夫羅拜鵝飛起勸農使者來行水子由穫麥云少年
食稻不食粟老居頴川稻不足人言小麥勝西川雪花

水磨煮成玉令淘槐葉冰上齒湯餅羊羹火入腹五年
隨俗麤得飽晨朝稻米纔供粥兒曹知我老且饒觸熱
泉城正三伏田家有信呼即來亭午驅牛汗如浴吾兒
生來讀書史不慣田家爭斗斛今年久旱麥粒細及半
罷休饒老宿歸來爛漫睨蒼耳來歲未知還爾熟百口
且留終歲儲貧交強半倉無穀張芸叟打麥云打麥打
麥彭彭魄魄聲在山南應山北四月太陽出東北纔離
海嶠麥尚青轉到天心麥已熟鵲旦催人夜不眠竹雞
呼雨雲如墨大婦腰鑣出小婦具筐逐上壠先拈青下
壠已成束田家以苦乃為樂敢憚頭枯面焦黑貴人薦

廟已嘗新酒醴雍容會所親曲終宴飫勞僮僕豈信田
家未入唇盡將精好輸公賦次把升斗求市人麥秋正
急又秧禾豐歲自少凶歲多田家辛苦可奈何將此打
麥詞無作插禾歌范石湖瑞麥云民和神福因其宜况
有仁先四者施吳稻即看收再熟周年先已秀雙岐薰
風半老黃金穗梅雨重春綠玉枝樂不可支聊發詠田
間日日是芳時陸放翁歌云苦寒勿怨天雨雪雪來遺
我明年麥三月翠浪舞東風四月黃雲暗南陌坐看比
屋歡騰聲已覺有司寬吏責腰鑣丁壯傾閭里拾穗兒
童動千百玉塵出磨飛屋梁銀絲入釜須寬湯寒醅發

劑炊麤裂新麻壓油寒具香大婦下機廢晨織小姑佐
庖忘晚妝老翁飽食笑捫腹林下擊壤歌時康又種麥
云墾地布宿麥飯牛臨野池未能貪沸日正恐失農時
矻矻鋤耰力勤勤祝史辭嘉平得三白吾飽豈無期朱
子葱湯麥飯云葱湯麥飯兩相宜葱補丹田飯療飢莫
謂此中滋味少前村還有未炊時楊誠齋詩云無邊綠
錦織雲機全幅青羅作地衣個是農家真富貴雪花消
盡麥苗肥戴石屏刈麥云腰鑣上壠刈黃雲東家西家
麥滿門前村宜婦拾滯穢饘粥有餘炊餅餌我聞淮南
麥最多麥田今歲屯干戈飽飯不知征戰苦生長此方

真樂土方秋崖農謠云春雨初晴水拍堤村南村北鷓
鴒唳含風宿麥青相接刺水柔秧綠未齊小麥青青大
麥黃護田沙逕遶羊腸秧畦岸岼水初飽塵甑家家飯
已香夏英公句云似法陰爻呈六穗或符陽數效三岐
元王元善題瑞麥圖云汝南今歲麥連雲一氣祥蒸德
化循春露潤含千壠秀薰風披拂五岐新嘉禾共穎宜
同頌神草聯莖恐漫珍旌異穎川元有例會聽增秩佐
經綸明瞿宗吉麥浪云翠濤無際拍天浮水氣生涼四
月秋路隔壠頭高抵岼人騎牛背穩如舟腥風只恐藏
魚鼈雪羽頻看起鷺鷥滄海桑田何足怪黃雲割盡見

平疇中瑤泉麥浪云芄芃秀色挺來牟片片黃雲似水
流風作跳波時隱見兩添新漲乍沈浮晴畦錦漾千層
穀寒隴濤生四月秋却怪狂瀾頻起陸漫教文偉賦中
收甘矮梅葱湯麥飯云葱湯麥飯丹田暖麥飯葱湯亦
可憐試向城樓高處望人家幾處未炊煙董思白太廟
薦麥云闕宮朝起肅精裡御苑來牟及薦新九葉靈光
開大歷雙岐瑞穎獻昌辰風迴玉几馨先稷露裛金莖
潔似蘋一自寢園祈報後於皇清頌遍周民近時田山
蘊麴云釀酒先治麴如穀之初種白墮傳方法牟麥獨
可用揉以薑杏汁包猶菰葉糲麴餅十字裂月令三伏

仲晝曝亭午炎夜滋花露重赤腳長鬚徒不異猿狙衆
竹筍檉木盆朝暮相搬弄西村黍將熟新米農夫送桑
落菊花開浮蛆成數甕車前擁八騶誰復為此夢但結
麴生歡不支大官俸對之口流涎樹間秋鳥哢未便荷
鍤埋已作酒德頌謝方山說餅聯句云臘殘邊氣寒霰
霽朔風冷官閒稀瀑直晷短謝朝請經過趁馬蹄羅列
見盃皿既飽更設食造次愧暇整厨娘理寒具中坐出
環餅色侔琅邪稻種類安定麴方法微胡麻調和汲冰
井摒擋亂紛紛團團成俄頃蘭湯漱玉屑冰穀翦蟬影
圓疑鏡卸盤艷若金脫礦一輪巧中規百鍊減無賴淨

煩上池漫句想纖手打并刀快割截齊紈妙清省霏微
玉蚪甲胸眺顧兔景蝦蟇蝕月渴驪龍攫珠猛頌德愛
芳香徵名欣合併品寧遜粧妝形已同頃領薰蒸浮渴
釜纖哲悅饒晴既足慰饕餮更可祝噎哽燈窺晃琉璃
酒漬散縻綆蹲齒狂客誕手潔唐帝做十字笑曾侈四
片嗤鸞省一筇得都尉再啖失洛潁果然適莽蒼決去
惜戲斷平生厭藜苳腸飢叫鼃黽忽驚食單富坐成腹
負青染指無遷延下箸皆雋永雞臠未足珍鵝炙詎堪
並裹肉快抽乙丞魚嘉出丙乍見天覆盆旋看日銜嶺
沃以壑源茶再鼓氣逾逞僮奴饜香風飢涎滴侯頸朗

月光漸移嚴寒夜屢警炙手藝松明引滿剖楓癭杯深
一燈青坐久衆星耿酒竭吁勤斟燭跋催速秉醉客冠
墜箕倦僕頭觸屏霜重壓狐腋坼急吠盧令世態笑井
泥生涯嘆桃梗簪盍殊復難拍動矧多幸飽死憐侏儒
形忘破畦町加餐雪花融覓句林鳥靜炙轂任縱橫注
坂競馳騁鬪險氣凌韓掞藻詞逼郢怪思筆然犀快語
喉吐鯁心苦飜食牛律嚴弓束檠翦綃成竒文嚼蔗得
佳境衆工聚輪輻六齋作鐘鼎百年空牢愁一醉歸溟
濤此樂當語誰故山寄張邴吳東壁光餅云餅師曉藝
紅爐炭光餅羅羅出火爇初疑穿破沈郎錢還如壓匾

韓嫣彈聞昔南塘戚將軍禦倭遠走東海岸三軍千里
裹糧來徵發往往誤朝饗特作此餅散軍中一串隨身
挂鎧釭干戈衝斥任鯨吞臨陣含哺和血汗身經百戰
兵不飢士氣激發倍獍悍以此克奏保障功東南半壁
擁屏翰將軍去今二百年餅式依然傳里閭此餅因冒
將軍名婦豎知名日相喚我生太平不知兵出謀不翅
肉食漢朝來市得數十枚一時恣啖早過半朵頤最喜
得真味入座無事求鹽蒜有時為客添肥甘裹食呼童
割膾胖飽餐閒聽餅家謳鼓腹遊行樂無算走筆書成
光餅歌饌經補作新公案錢脩亭麥浪云芳草如煙煙

不如汶陽晴浪麥光舒忽驚暎水偏飛雉失喜臨洲誤
羨魚幾縷絲飄輕燕外廿番風度落花餘青疇不斷明
湖色試聽田歌答老漁王澡航積熙刈麥云踈籬茅屋
戶常闕別後三年倦又還識得萬鍾皆瑣瑣爭如十畝
自閑閑聽來牧笛遙遮樹望去人家半倚山二麥收成
饒餅餌朝餐婦子一歡顏曹地山秀先麥色云深青竊
綠色頻添春麥詩成 睿藻拈佇眄黃雲初夏熟欣逢
翠蹕萬人瞻香烟隴畔嬉遊過令甲 官家愛惜嚴
最是風光絕勝處曰暘曰雨兩相兼金醉墨麥脚云兩
岐九穗陌阡覃餅餌香傳作美談綠浪連畦征鴈北黃

雲覆隴凱風南鬚先肅殺風吹亞秀早離披日熨酣大
軫貢來香復碧好教磨賦共相叅閨秀錢冠之麥粥云
亭午松牕夢到無清風飯熟滑於酥二紅省識蘇家樣
肯厭冰厨脫粟粗又蝴蝶麵云飄揚白雪趁春裁疑是
羅浮入夢來誰惜一生花底活蘄湯深處現仙胎又燒
麥云延精吹燭火銷膏椎髻蓬頭氣亦豪莫笑陶家風
味冷侯門熟客慣風餐

附錄

雀麥爾雅蕎麥即燕麥也又名鷺麥一名杜姥草一
名牛星草似小麥而弱

附錄

蕎麥一名苡麥一名烏麥一名花蕎八九月熟莖赤開

小白花唐白樂天句云獨出門前望野田月明蕎麥花
如雪宋陸放翁詩云城南城北如鋪雪原頭家家種蕎
麥霜晴收歛少在家餅餌今冬不憂窄胡麻壓油油更
香油新餅美爭先嘗獵歸熾火燎雉兔相呼置酒喜欲
狂陌上行歌忘惡歲小婦紅妝穗簪髻詔書寬大與天
通逐熟淮南幾誤計石湖句云落日青山都好在山間
蕎麥滿芳洲近時胡瓶菴詩云可愛紅莖愛雪花收時
細碾瀉輕沙白家北市風生後湯餅初擎慰齒芽韓公
復夢周蕎麥霜云種豆已死種蕎麥舉室典盡作一擲
秋禾惟有此種晚九日來雁可得食秋來雨氣亦飛揚

耳中往往聞點滴老農愁疾轉相慶已見蕎花滿地白
哀哉西風一夜狂蕎麥殺盡中秋霜管絨若蕎麥花云
春雪絮楊柳秋雪秀蕪葭晚夏何處雪連畦蕎麥花
苦蕎麥出南方春社前後種之莖青葉尖花綠穀之下
品可為糕餌

附錄

附錄 瞿麥爾雅大菊蘧麥一名麥句薑廣雅以為茈萋一名
巨句麥一名大蘭一名地麵葉細花紅紫赤子似麥畝
收十石性多穢作餐甚滑細可作餅

附錄

稻一名稌有稷有糯地官有稻人漢有稻田使者通稷糯
而言之也糯稻一名秣稻稷之小者謂之秣一名占稻